



第五

和靖詩鈔
徂徠詩鈔
武仲清江集鈔

五

柳田文庫
文庫11
D 156
5

文庫 11
D 156
5

和靖詩鈔

林逋字君復杭之錢塘人少孤力學立志不仕結廬西湖孤山真宗聞其名賜粟帛詔長吏歲時勞問臨終詩有茂陵他日求遺稿猶喜曾無封禪書時人高其志識賜謚和靖先生逋不娶無子所居多植梅畜鶴泛舟湖中客至則放鶴致之因謂梅妻鶴子云其詩平澹邃美而趣向博遠故辭主靜正而不露刺譏梅聖俞謂詠之令人忘百事大數塞王孟之幽而攄劉韋之逸歐陽文忠愛其詠梅花詩疎影橫斜一聯謂前世未有此句黃涪翁則以雪後園林二語為勝之蓋一取神韻一取意趣皆為傑句然知歐陽之所賞者多知涪翁之所賞者少也所作雖夥未嘗留稿或問之曰吾不欲取名于時

010190554070

48-12177

况後世乎。故所存百無一二。如當時稱其五言有草泥
行郭索。雲木叫鈎。輶句集中。已不可得。其他遺軼可知
也。

送牛秀才之山陽省兄

之子詠陟岡。別我歲時晏。後夜失羣鶴。高天着行鴈。楚山
遠近出。江樹青紅間。尊酒無足辭。離愁滿行盼。

和運使陳學士遊靈隱寺寓懷

山竅氣相合。旦暮生秋陰。松門韻虛籟。鐘若鳴瑤琴。舉目
羣狀動。傾耳百慮沉。按部旣優游。時此振衣襟。泓澄冷泉
色。寫我清曠心。飄飄白猿聲。答我雅正吟。經臺復升井。捫
蘿嘗徧臨。鶴蓋青霞映。玉趾蒼苔侵。溫顏煦樵木。真性馴
幽禽。所以仁惠政。及物一一深。酒斚璘珣壁。返駕旃檀林。

回睨窳堵峰。天半千萬尋。

上湖閒泛艤舟石函。因過下湖小墅。

平皋望不極。雲樹遠依依。及向扁舟泊。還尋下瀨歸。青山
連石埭。春水入柴扉。多謝提壺身。留人到落暉。

西湖舟中值雪

浩蕩彌空濶。霏霏接水濱。舟移忽自却。山近未全分。東軫
閒清泛。溫鑪擁薄薰。悠然詠招隱。何許款離羣。

湖村晚興

滄洲白鳥飛。山影落晴暉。映竹犬初吠。弄船人各歸。水波
隨月動。林翠帶煙微。寺近疎鐘起。蕭然還掩扉。

湖山小隱

猿鳥分清絕。林蘿擁翠微。步穿僧徑出。肩搭道衣歸。水墅

香醪熟。煙崖早笋肥。功名無一點。何要更忘機。
園井夾蕭森。紅芳墮翠陰。晝巖松鼠靜。春塹竹鷄深。歲課
非無术。家藏獨有琴。顏原遺事在。千古壯閑心。
衡門鄰晚島。環堵背寒岡。片月通蘿徑。幽雲在石牀。客遊
拋鄆社。漁事擬滄浪。管樂非吾尚。昂頭官自方。

小隱自題

竹樹遶吾廬。清溪趣有餘。鶴閒臨水久。蜂懶得花疎。酒病
妨開卷。春陰入荷鋤。嘗憐古圖畫。多半寫樵漁。

北山寫望

晚來山北景。圖畫亦應非。村路飄黃葉。人家濕翠微。樵當
雲外見。僧向水邊歸。一曲誰橫笛。兼葭白鳥飛。

中峰

中峰一徑分。盤折上幽雲。夕照前村見。秋濤隔嶺聞。長松
含古翠。衰藥動微薰。自愛蘇門嘯。懷賢事不羣。

小圃春日

岸幘倚微風。柴籬春色中。草長閨粉蝶。林暖墜青蟲。載酒
爲誰子。移花獨乃翁。於陵偕隱事。清尚未相同。

郊園避暑

柴門鮮人事。氛垢頗相忘。愛彼林間靜。復茲池上涼。託心
時散帙。遲客復攜觴。况有陶籬趣。歸禽語夕陽。

園廬秋夕

蘭社裊裊香。開扉趣自長。寒煙宿墟落。清月上林塘。意想
殊爲適。形骸固可忘。援琴有餘興。聊復寄吟觴。

山村冬暮

衡茅林麓下。春色已微茫。雪竹低寒翠。風梅落晚香。樵期多獨往。茶事不全忙。雙鷺有時起。橫飛過野塘。

山中冬日

殘雪照籬落。空山無俗誼。鷄寒懶下樹。人晏獨開門。廢圃春榮動。回塘霧氣昏。誰家歲酒熟。輟棹憶西村。

旅館寫懷

垂成歸不得。危坐對滄浪。病葉驚秋色。殘蟬怕夕陽。可堪疎舊計。無復更剛腸。的的孤峰意。淡宵一夢狂。

出曹州

詩懷動歎嗟。驢立帽陰斜。雨灤生新蘚。茅叢夾舊槎。午煙昏獨店。岡路透誰家。幾日江南興。扁舟泊岸沙。

盱眙山寺

下傍盱眙縣。山崖露寺門。疎鐘過淮口。一徑入雲根。竹老生虛籟。池清見古源。高僧拂經榻。茶話到黃昏。

畱題李頡林亭

無琴枕鶴經。盡日卧林亭。啼鳥自相語。幽人誰欲聽。半闌花籬白。一徑草盤青。何必對樽酒。此中堪獨醒。

翠微亭

在金陵清涼寺

亭在江干寺。清涼更翠微。秋階響松子。雨壁上苔衣。絕境長難得。浮生不擬歸。旅懷何計是。西崦又斜暉。

臺城寺水亭

金井前朝事。林僧問不知。綠苔欺破閣。白鳥占閒池。清楚曾經管。荒唐直到隋。南廊一聲磬。斜照獨凝思。

淮甸南遊

幾許搖鞭興。淮天晚景中。樹林兼雨黑。草實着霜紅。膽氣
誰憐飲。衣裝自笑戎。寒威敢相掉。獵獵酒旗風。

聞葉初秀才東歸

高鴻多北向。極目雨餘天。春滿吳山樹。人登汴水船。吟生
千里月。醉盡一囊錢。宜便懷鄉邑。時清復少年。

病中謝馮彭年見訪

老去已多病。况當梅雨時。山空門自掩。晝永枕頻移。晚燕
巢猶濕。新篁籜未披。若非求仲至。誰復問棲遲。

將歸四明夜坐話別任君

酒酣相向坐。別淚濕吟衣。半夜月欲落。千山人憶歸。亂塵
終古在。長瀑倚空飛。明日重攜手。前期易得違。

和梅聖俞雪中同虛白上人見訪

湖上玩佳雪。相將惟道林。早煙村意遠。春漲岸痕深。地僻
過三徑。人閑試五禽。歸橈有餘興。寧復比山陰。

和酬杜從事題壁

弭蓋入衡宇。相看情獨深。蕭疎秋樹色。老大故人心。佳話
頻移晷。清標幾拂襟。寥然長卿壁。題此比兼金。

夏日寺居和酬葉次公

午日猛如焚。清涼愛寺軒。鶴毛橫薜陣。蟻穴入莎根。社信
題茶角。樓衣筦酒痕。中餐不勞問。筍菊淨盤鐫。

送長吉上人

囊集暮雲篇。行行宵廢禪。青山買未暇。朱闕去隨緣。茗試
幽人井。香焚賈客船。淮流遲新月。吟玩想忘眠。

春日送袁成進士北歸

春潮上海門。歸鴈遠行分。千里倦行客。片帆還送君。酒波欺碧草。歌屢裹晴雲。來歲東堂桂。聊酬一戰勳。

送史殿省典封州

馬援疏鬢色。銅標何可窮。人煙時亦有。海色自如空。髭髮梅分白。旌旗瘴減紅。惟應蒔藥罷。埋照酒醪中。

送王舍人罷兩浙憲赴闕

上問還旌節。明廷覲冕旒。清談傾綺席。蠹簡壓歸舟。越俗今無訟。閑田亦有秋。公朝論爵賞。當拜富民侯。

送昱師赴請姑蘇

同載闔閭人。衣囊覆氎巾。新煙赤岸暝。融雪太湖春。鐘遠移齋候。香遲上定身。當知舉如意。寶地雨花頻。

送皎師歸越

林間久離索。忽忽望西陵。靜戶初聞扣。歸舟又說登。野煙含樹色。春浪疊沙稜。幸謝雲門路。同尋苦未能。

送越倅楊屯田赴闕

越中分治罷。山水別來初。詩景多留石。船痕半載書。野程江樹遠。公讌郡樓虛。看塞嚴徐召。清風滿直廬。

送思齊上人之宣城

林嶺藹春暉。程程入翠微。泉聲落坐石。花氣上行衣。詩正情懷澹。禪高語論稀。蕭閑水西寺。駐錫莫忘歸。

洞霄宮

大滌山相向。華陽路暗通。風霜唐碣久。草木漢祠空。劔石苔花碧。丹池水氣紅。幽人天柱側。茅屋灑松風。

寄思齊上人

松下中峰路。懷師日日行。靜鐘浮野水。淡寺隔春城。閣掩茶煙晚。廊迴雪溜清。當期相就宿。詩外話無生。

寄吳肅秀才

時吳在天王院夏課

肄業寄僧房。暑天湖上涼。竹風過枕簟。梅雨潤巾箱。引步青山影。供吟白鳥行。明年重訪舊。身帶桂枝香。

寄清曉閣黎

前時春雪晴。林壑趣彌清。幾憶山陰講。兼忘谷口耕。樹叢歸夕鳥。湖影浸寒城。還宜重相訪。柴門掩杜蘅。

寄孫仲簿公

低折滄洲簿。無書整兩春。馬從同事借。妻怕罷官貧。道僻收閒藥。詩高笑古人。仍聞長吏奏。表乞瑣廳頻。

寄和昌符

家近太行居。西歸壓一驢。同儕多及第。高論獨知書。名迹收藏徧。公門請謁疎。離愁不可寫。蟬噪夕陽初。

淮甸城居寄任刺史

擾擾非吾事。浚居斷俗情。石莎無雨瘦。秋竹共蟬清。劍在慵閑拂。詩難憶細評。寥然獨楮枕。淮月上山城。

寄輦下傳神法相大師

禁寺諸供奉。如師藝學稀。粉輕昏古本。羅重拆秋衣。淨賺生瓶暈。連陰長竹圍。算應支遁馬。毛骨若無肥。

寄臨川司理趙時校書

遠宦風波隔。歸期歲月頻。天形孤鳥晚。煙色大江春。驛路向江郭。船檣留賈人。高臺望不極。空使鬢華新。

贈崔少微

賢才負聖朝。終日掩衡茅。尚靜師高道。甘貧絕俗交。曬碑
看壁蠹。蒸木拾鄰梢。却憶楊夫子。勞勞事解嘲。

贈胡介

妻兒終礙棄。舊識盡名賢。高節嫌趨世。常流笑學仙。金方
燒易得。星度算來玄。祇說尋山去。相期已數年。

宿洞霄宮

秋山不可畫。秋思亦無垠。碧澗流紅葉。青林點白雲。涼陰
一鳥下。落日亂蟬分。此夜芭蕉雨。何人枕上聞。

湖山小隱二首

道和權名便絕交。一峰青翠濕衡茅。莊生已憤鴟鷂嚇。楊
子休譏蝦蟇嘲。滴滴藥泉來石竇。霏霏茶藹出松梢。琴僧
近借南薰譜。且併閑王子細抄。

閑搭綸巾擁縹囊。此心隨分識興亡。黑頭爲相雖無謂。白
眼看人亦未妨。雲噴石花生劒壁。雨敲松子落琴牀。清猿
幽鳥遙相叫。數筆湖山又夕陽。

湖上晚歸

臥枕船舷歸思清。望中渾恐是蓬瀛。橋橫水木已秋色。寺
倚雲峰正晚晴。翠羽濕飛如見避。紅蕖香嫋似相迎。依稀
漸近誅茅地。鷄犬林蘿隱隱聲。

湖上初春偶作

梅花開盡臘亦盡。晴暖便如寒食天。春色半歸湖岸柳。人
家多上郭門船。支禽相並映短草。翠激欲生浮嫩煙。幾處
酒旗山影下。細風時已弄繁絃。

西湖春日

爭得才如杜牧之。試來湖上輒題詩。春煙寺院敲茶鼓。夕照樓臺卓酒旗。濃吐襟芳薰歎喟。濕飛雙翠破漣漪。人間幸有蓑兼笠。且上漁舟作釣師。

池上春日

一池春水綠於苔。水上花枝竹間開。芳草得時依舊長。文禽無事等閒來。年顏近老空多感。風雅含情苦不才。獨有浴沂遺想在。使人終日此徘徊。

西巖夏日

蕙帳蕭閑掩弊廬。子真巖石坐來初。爲驚野鳥巢間乳。懶過隣僧竹裏居。新溜迸涼侵靜語。晚雲浮澗上殘書。何煩彊提白團扇。一柄青松自有餘。

夏日卽事

石枕涼生菌閣虛。已應梅潤入圖書。不辭齒髮多衰病。所喜林泉有隱居。粉竹亞梢垂薄露。翠荷差影聚遊魚。北窗人在羲皇上。時爲淵明一起予。

隱居秋日

行藥歸來卽杜門。嘯臺秋色背人羣。幽蟲傍草晚相映。遠水看煙寒未分。高亢可能稱獨行。窮空猶擬賴斯文。過從好事今誰是。自笑何如楊子雲。

秋日湖西晚歸舟中書事

水痕秋落蟹螯肥。閑過黃公酒舍歸。魚覺船行沉草岸。犬聞人語出柴扉。蒼山半帶寒雲重。丹葉疎分夕照微。却憶清谿謝太傅。當時未解惜蓑衣。

溪居雜興六首

青寺少

諸葛孔明謝安石畜經濟之才雖結廬南陽攜妓東山未嘗不以平一字內濟致生民爲意鄙夫則不然胸腹空洞剪然無所存置但能行樵坐釣外寄心於小律詩時或鑿兵景物衡門情味則倒覘二君而反有得色凡所寓興輒成短篇總曰溪居雜興詩六首蓋所以狀林麓之幽勝攄凡格之閑曠且非敢求聲於當世故援筆以顯其事云

隱居松籟細錚然何獨微之重碧鮮已被遠峰擊巒巒更禁初月吐娟娟門庭靜極霖苔露籬援涼生裊菊煙中有病夫披白搭瘦行清坐詠遺篇

四壁垣衣鈞具腥已甘衡泌號沉冥伶倫近日無侯白奴僕當時有衛青花月病懷看酒譜雲蘿函信寄茶經茅君

使者蕭閑甚獨理叢毛向戶庭

薄夫何苦事姦姦一室琴書自解顏峰後月明秋嘯去水邊林影晚樵還文章敢道長於古光景渾疑邇却閑多少煙霞好猿鳥令人惆悵謝東山

冉冉秋雲抱嘯臺一丘松竹是閑媒誰聞濟北傳兵略枉說山東出相才樵褐短長披搯滕丹爐高下壘懸胎三千功行無圭角可望虛皇九錫來

上書可有三千牘下筆曾無一百函閒卷孤懷背塵世獨營幽事傍雲巖僧分乳食來陰洞鶴觸茶薪落蠹杉未似周顛少貞勝北山應免略相銜

松竹封侯尚未尊石爲公輔亦云云清華自合論閑客玄墨何妨事靜君鶴料免慚尸厚祿茶功兼擬策元勳幽人

不作山中相且擁圖書卧白雲

雜興四首

短褐蕭蕭頂幅巾擁書纔罷卽噴呻耕樵可似居山者飲
饌長如病酒人閉戶不無慵答客焚香除是靜朝真前賢

風慳聊希擬一刺偏多并大春

散帙揮毫總不忤病懷愁緒坐相兼苔痕作意生秋壁樹
影無端上古簾一經等閑甘汨汨五門平昔避炎炎惟應

數刻清涼夢時曲顏肱典未厭

湖上山林畫不如霜天時候鶴園廬梯斜晚樹收红柿筒
直寒流得白魚石上琴尊苔野淨籬陰鷄犬竹叢疎一關

兼是和雲掩敢道門無聊相車

掉臂何妨入隱淪高賢應總貴全真次山有以稱聲叟魯

望兼之傳散人拂水遠天孤榜晚夾村微雨一溪春不知
圖畫誰名手狀取江湖太古民

孤山後寫望

水墨屏風狀總非作詩除是謝玄暉溪橋裊裊穿黃落樵
斧丁丁斫翠微返照未沉僧獨往長煙如淡鳥橫飛南峰
有客鋤園罷閑倚籬門忘却歸

孤山寺端上人房寫望

底處憑闌思眇然孤山塔後閣西偏陰沉畫軸林間寺零
落碁枰葑上田秋景有時飛獨鳥夕陽無事起寒烟遲留
更愛吾廬近祇待重來看雲天

孤山寺

雲峰水樹南湖寺祇隔叢篁作並鄰破殿靜披蘿白古齋

房閑試酪如春。白公睡閣幽如畫。張祐詩牌妙入神。乘興
醉來拖木突。翠苔蒼蘚石磷磷。

西湖

混元神巧本無形。匠出西湖作畫屏。春水淨於僧眼碧。晚
山濃似佛頭青。藥爐粉堵搖魚影。蘭杜煙叢閣鷺翎。往往
鳴榔與橫笛。細風斜雨不堪聽。

平居遣興

有甚餘閑得解嘲。高慵時把几檠敲。早收晚鳥沉幽語。歷
刺煙篁露病梢。草野交遊披褐見。神仙書史點朱抄。皇朝
不是甘逃遁。爭向心如許與巢。

池陽山店

數家村店簇山旁。下馬危橋已夕陽。鶯鳥忽衝谿霧破。暗

花開墮。塹風香。時間盤泊心猶戀。日後尋思興必狂。可惜
迴頭一聲笛。酒旗搖曳出疎篁。

易從上人山亭

湖上汪灣隔數峰。籬門和竹夾西東。閑來此地行無厭。又
共吾廬看不同。靈隱路歸秋色裏。招賢庵在鳥行中。屏風
若欲相攬見。合把巉巖與畫工。

過蕪城縣

詩中長愛杜池州。說着蕪城是勝遊。山掩縣城當北起。渡
衝官道向西流。風稍檣碇綱初下。雨擺魚薪市未收。更好
兩三僧院舍。松衣石髮鬪山幽。

無爲軍

掩映軍城隔水鄉。人煙景物共蒼蒼。酒家樓閣搖風旆。茶

客舟船簇雨檣殘。箇遠砧聞野墅。老苔寒檜看僧房。狎鷗
更有江湖興。珍重江頭白一行。

耿濟口舟行

環迴幾合似江干。刺眼詩幽盡狀難。沙背半平春晚濕。水
痕無底照秋寬。老霜蒲葦交千刃。怕雨鳧鷖著一攢。擬就
孤峰寄篔簹。舊鄉漁業久凋殘。

園廬

柴關寒井對蕭晨。自愛棲遲近古人。閑草徧庭終勝俗。好
書堆案轉甘貧。橋邊野水通漁路。籬外青山見寺鄰。懶爲
躬耕詠梁甫。吾生已足太平民。

春陰

似雨非晴意思淡。宿醒牽率卧春陰。苦憐燕子寒相並。生

怕梨花晚。不禁薄薄簾幃。欺欲透。遙遙歌管壓來沉。北園
南陌狂無數。只有芳菲會此心。

山園小梅二首

衆芳搖落獨暄妍。占盡風情向小園。疎影橫斜水清淺。暗
香浮動月黃昏。霜禽欲下先偷眼。粉蝶如知合斷魂。幸有
微吟可相狎。不須檀板共金尊。

剪綃零碎點酥乾。向背稀稠畫亦難。日薄縱甘春至晚。霜
淡應怯夜來寒。澄鮮祇共鄰僧惜。冷落猶嫌俗客看。憶着
江南舊行路。酒旗斜拂墮吟鞍。

又詠小梅

數年閑作園林主。未有新詩到小梅。摘索又開三兩朵。團
欒空遶百千迴。荒隣獨映山初盡。晚景相禁雪欲來。寄語

清香少愁結。爲君吟罷一街杯。

梅花

吟懷長恨負芳時。爲見梅花輒入詩。雪後園林纔半樹。水邊籬落忽橫枝。人憐紅艷多應俗。天與清香似有私。堪笑亦風味。解將聲調角中吹。

小園煙景正凄迷。陣陣寒香壓麝臍。湖水倒鏡疎影動。屋簷斜入一枝低。畫名空向閒時看。詩客休徵故事題。慚愧黃鸝與蝴蝶。祇知春色在桃溪。

杏花

蓓蕾枝梢血點乾。粉紅腮頰露春寒。不禁煙雨輕敲着。祇好庭臺愛惜看。隈柳傷桃斜欲墜。等鶯期蝶猛成團。京師巷陌新晴後。賣得風流更一般。

贈胡明府

一琴牢落倚松窗。孤澹無君得趣長。謁廟有時封縣版。坐衙終日着公裳。爲收牌印教村僕。偶檢圖書見古方。徵足稅錢人更靜。卻捲吟策立秋廊。

寄傅霖

葛蔓煙枯束六經。高廉渾與昔賢停。黃牙稚子跨牛種。白眼山人識劍形。寒暄草秀林酒壯。曉思河曲雨。槎腥。傳聞曾說平生事。不要清朝夢武丁。

寄太白李山人

顏如童子髮如鬢。卜築溪當太白西。身上祇衣麤直掇。馬前長帶古偏提。鷓鴣懶擊三千水。龍虎閑封六一泥。幾獨枕肱人迹外。半窗松雪論天倪。

春日寄錢都使

桃花枝重肉紅垂。萱草抽苗綠肥。正語暖鶯風細細。著雙寒燕雨稀稀。亭臺物景兼飄絮。宅院時情漸夾衣。拍背挾肩行樂事。不甘離索向芳菲。

寄題歷陽馬仲文水軒

構得幽居近郭西。水軒風景獨難齊。煙含晚樹人家遠。雨濕春蒲燕子低。紅燭酒醒多聚會。粉牋詩敵幾招攜。旅遊今日堪搔首。搖落山城困馬啼。

春暮寄懷曹南通守任寺丞

中行

跌蕩情懷每事同。十年曹社醉春風。彈弓園圃陰森下。碁子廳堂寂靜中。赤脚我猶無一婢。黥頭君合作三公。江湖今日還勞結。目送歸飛點點鴻。

復廢前韻且以陋居幽勝詭而誘之

畫其藥材懸屋壁。琴兼茶具入船扉。秋花挹露明紅粉。水鳥衝煙濕翠衣。石磴背穿林寺近。竹煙橫點海山微。百千幽勝無人見。說向吾師是洩機。

孤山隱居書壁

山水未滾猿鳥少。此生猶擬別移居。直過天竺溪流上。獨樹爲橋小結廬。

池上作

簇簇菰蒲映蓼花。水痕天影蘸秋霞。分明似箇屏風上。飛起鷓鴣一道斜。

竹林

寺籬斜夾千梢翠。山磴淡穿萬籜乾。却憶貴家廳館裏。粉

牆時畫數莖看。

葑田

淤泥肥黑稻秧青。濶蓋滾流旋旋生。擬倩湖君書版籍。水仙今佃老農耕。

易從師山亭

林表秋山白鳥飛。此中幽致亦還稀。西村渡口人煙晚。坐見漁舟兩兩歸。

秋江寫望

蒼茫沙嘴鷺鷥眠。片水無痕浸碧天。最愛蘆花經雨後。一篷煙火飯漁船。

乘公橋作

晚峰橫碧樹梢紅。數榜漁曾水影中。憶得江南曾看着。巨

然名畫在屏風。

巨然僧尤妙山水。

初夏

乳雀啁啾日氣濃。雉桑交影綠重重。秧田百畝鵝黃犬。橫策溪村屬老農。

秋日含山道中廻寄歷陽希然山人

村落人家摠入詩。下驢盤薄立多時。霜陂一掬清於鑑。漱着牙根便憶歸。

送易從師還金華

吟卷田衣歲向殘。孤舟夜泊大江寒。前巖數本長松色。及早歸來帶雪看。

自作壽堂因書一絕以誌之

湖上青山對結廬。墳前脩竹亦蕭疎。茂陵他日求遺稿。猶

喜曾無封禪書

春日懷歷陽後園遊兼寄宣城天使

昔年行樂伴王孫。事盡清狂是後園。一榻竹風橫懶架。半軒花月倒頑盆。佳人暗引鸞言語。芳草閑迷蝶夢魂。今日淒涼舊春色。可堪煙雨近黃昏。

徂徠詩鈔

士

石介字守道。兗州奉符人。年二十六舉進士甲科。爲鄆州觀察推官。歷官至國子監直講。慶曆中進用韓范富杜諸臣。介躍然喜曰。此盛事也。雅頌吾職。其可已乎。乃作慶曆聖德詩。直指大臣。分別邪正。詩出。泰山孫明復曰。子禍始于此矣。以是爲人所擠。杜祁公韓魏公俱薦之。拜太子中允。直集賢院。尋卒于家。怒之者謂其詐死。北走契丹。請斲棺驗之。幸不許。所爲詩文皆根抵至道。排斥佛老。及姦宦女。庶幾聖人之徒。魯人稱爲徂徠先生。因以名其集。永叔詩云。問胡所專心。仁義丘與軻。楊雄韓愈氏。此外豈知他。尤勇攻佛老。奮筆如揮戈。又云。金可爍而銷。玉可碎非堅。不若書以紙。六經皆紙傳。

但當書百本傳百以爲千。或落于四夷。或藏在溪山。待
彼謗焰熄。放此光芒懸。今讀其詩。嶙峋硤礪。挺立千尋。
溫厚之意。存于激直。得見風人之遺。然正學忤時。直道
致黜。千古一轍。其可哀也。

慶曆聖德頌

三月二十一日。大昕皇帝御紫宸殿。朝百官。相得象殊。
拜竦樞密使夷簡。以司徒歸第。二十二日。制命昌朝參
知政事。弼樞密副使。二十六日。勅除脩靖素。並充諫官。
四月八日。皇帝御紫宸殿。朝百官。衍樞密使仲淹。琦樞
密副使。乃用御史中丞拱宸。御史邈。御史平諫。官脩靖。
十一疏。追竦樞密使勅。十三日。勅又除襄爲諫官。天地
人神昆蟲草木。無不懽喜。皇帝退。嘉進賢。發於至聰。動

於至誠。奮於睿斷。見於剛克。陟黜之明。賞罰之公也。上
視漢魏隋唐五代。凡千五百年。其間非無聖神之主。盛
明之時。未有如此選人之精。得人之多。進人之速。用人
之盡。實爲希濶。殊尤曠絕。盛事在皇帝之德。之功。爲卓
犖瑰偉。神明魁大。古者一雲氣之祥。一草木之異。一蹄
角之怪。一羽毛之瑞。當時羣臣。猶且濃墨大字。金頭鈿
軸。以稱述頌美。時君功德。以爲無前之休。丕天之績。如
仲淹弼。實爲不世出之賢。求之於古。堯則夔龍舜則稷
契。周則闕散。漢則蕭曹。唐則房魏。陛下有之。諸臣亦皆
今天下之人。望爲宰相。諫官者。陛下盡用之。此比雲氣
草木蹄角羽毛之異。萬萬不侔。豈可翻無歌詩雅頌。以
播我君之休聲。烈光神功聖德。刻于琬琰。流于金石。告

于天地。奏于宗廟。存于萬千年。而無窮盡哉。臣實羞之。臣嘗愛慕唐大儒韓愈爲博士。日作元和聖德頌千二百言。使憲宗功德赫奕燁燁。昭于千古。至今觀之。如在當日。陛下今日功德無讓憲宗。臣文學雖不逮韓愈。而亦官於太學。領博士職。歌詩讚頌。乃其職業。竊擬於愈。輒作慶曆聖德頌一首。四言凡九百六十字。文辭鄙俚。固不足以發揚臣子之心。亦欲使陛下功德燁燁。昭于千古。萬千年後。觀之。如在今日也。臣不勝死罪。臣賤無路以進。姑藏諸家。以待樂府之採焉。

於維慶曆三年三月。皇帝龍興。徐出闈闔。晨坐太極。晝開閭闔。躬攬賢英。手鋤姦桀。大聲颯颯。震搖六合。如乾之動。如雷之發。昆蟲躡躅。妖怪藏滅。同明道初。天地嘉吉。初聞皇帝。蹙然言曰。予父予祖。付予大業。予恐失墜。實賴輔弼。汝得象殊。重慎微密。君相予久。予嘉民伐。君仍相予。笙鏞斯協。昌朝儒者。學聞該洽。與予論政。傳以經術。汝貳二相。庶績咸秩。惟汝仲淹。汝誠予察。太后乘勢。湯沸大熱。汝時小臣。危言業業。爲予司諫。正予門關。爲予京兆。聖予讒說。賊叛于夏。往予式遄。六月酷日。大冬積雪。汝暑汝寒。同於士卒。予聞辛酸。汝不告乏。予晚得弼。予心弼悅。弼每見予。無有私謁。以道輔予。弼言淡切。予不堯舜。弼自咎罰。諫官一年。奏疏滿篋。侍從週歲。忠力盡竭。契丹亡義。檣杪饕餮。敢侮大國。其辭慢悖。弼將予命。不畏而懾。卒復舊好。民得食褐。沙磧萬里。死生一節。視弼之膚。霜剝風裂。觀弼之心。鍊金鍛鐵。寵名大官。以酬勞渴。弼辭不受。其志莫奪。惟仲

淹弼一夔一契。天實資予。予其敢忽。並來弼予。民無瘳札。曰。衍汝來。汝予黃髮。事予二紀。毛禿齒豁。心如一兮。率履弗越。遂長樞府。兵政無蹶。予早識琦。琦有奇骨。其器魁欄。豈視居櫟。其人渾樸。不施剗。可屬大事。敦厚如勃。琦汝副衍。知人予哲。惟脩惟靖。立朝讞讞。言論礫礫。忠誠特達。祿微身賤。其志不怯。嘗詆大臣。亟遭貶黜。萬里歸來。剛氣不折。屢進直言。以補予闕。素相之後。含忠履潔。昔爲御史。幾叩予榻。至今諫疏。在於箱匣。襄雖小臣。名聞于徹。亦嘗獻言。箴予之失。剛守粹慤。與脩儔匹。並爲諫官。正色在列。予過汝言。無鉗汝舌。皇帝明聖。忠邪辨別。舉擢俊良。掃除妖魅。衆賢之進。如茅斯拔。大姦之去。如距斯脫。上倚輔弼。司予調燮。下賴諫譴。維予紀法。左右正人。無有邪孽。予望

太平日不逾浹。皇帝嗣位二十二年。神武不殺。其默如淵。聖人不測。其動以天。賞罰在予。不失其權。恭已南面。退姦進賢。知賢不易。非明不得。去邪惟艱。惟斷乃克。明則不貳。斷則不惑。旣明且斷。惟皇之德。羣下踧踖。重足屏息。交相告語。曰。惟正直。毋作側僻。皇帝汝殛。諸侯危慄。墮玉失舄。交相告語。皇帝神明。四時朝覲。謹脩臣職。四夷走馬。墜鐙遺策。交相告語。皇帝神武。解兵脩貢。永爲屬國。皇帝一舉羣臣懾焉。諸侯畏焉。四夷服焉。臣願陛下壽萬千年。

汴渠

隋帝荒宴遊。厚地剝爲溝。萬舸東南行。四海困橫流。義旗舉晉陽。錦帆入揚州。揚州竟不返。京邑爲墟丘。吁哉汴渠水。至今病不瘳。世言汴水利。我爲汴水憂。利害我豈知。吾

試言其由。汴水濬且長。汴水溢且邁。千里瀉地氣。萬世勞人謀。舳舻相屬進。餽運曾無休。一人奉口腹。百姓竭膏油。民力輸公家。斗粟不敢收。州侯共王都。尺租不敢留。太倉粟。我我。冗兵食無羞。上林錢朽貫。樂官求要優。吾欲塞汴水。吾欲壞官舟。請君簡賜予。請君節財求。王畿方千里。邦國用足周。盡省轉運使。重封富民侯。天下無移粟。一州食一州。

麥熟有感 癸酉中作

去年經春頻肆赦。拜赦人忙走如馬。五月不雨麥苗死。赦貧不能活窮寡。今年經春無赦書。十日一雨及時下。五月麥熟人民飽。一麥勝如四度赦。吾願吾君與吾相。調和陰陽活元化。陰陽無病元氣活。風雨調順苗多稼。使麥長熟人不饑。敢告吾君不須赦。

讀詔書 乙亥中作

關中有山生虎狼。虎狼性虓不可當。去歲食人十有一。無辜被此惡物傷。守臣具事奏聖帝。聖帝讀之惻上意。乃詔天下捕虎狼。意欲斯民無枉死。吾君仁覆如天地。只知虎狼有牙齒。害人不獨在虎狼。臣請勿捕捕貪吏。

三豪詩送杜默師雄 并序

本朝八十年。文人爲多。若老師宿名。不敢論數。近世作者。石曼卿之詩。歐陽永叔之文。辭。杜師雄之歌。篇。豪於一代矣。師雄學於予。辭歸。作三豪詩以送之。

曼卿豪於詩。社壇高數層。永叔豪於辭。舉世絕儔朋。師雄歌亦豪。三人宜同稱。曼卿苦泪沒。老死殿中丞。身雖埋黃

泉詩名長如水。永叔亦連蹇。病鬱方騫騰。四海讓獨步。三
節最後登。師雄二十二。筆距鸞如鷹。才格自天來。辭華非
學能。迴顧李賀輩。麤俗良可憎。玉川月蝕詩。猶欲相憑凌。
曼卿苟不死。其才堪股肱。永叔氣甚閑。用之王道興。師雄
子勉旃。勿便生驕矜。

贈張績禹功

李唐元和間。文人如蠶起。李翱與李觀。言雄破姦宄。孟郊
及張籍。詩苦動天地。持正不退讓。子厚稱絕偉。元白雖小
道。爭名愈弗已。卒能霸斯文。昌黎韓夫子。吾宋興國來。文
人如櫛比。黃州才專勝。漢公氣全粹。晦之號絕羣。平地走
虎兕。謂之雖駮雜。亦文中騏驥。白稹洎盧震。江沱自爲水。
朱巖兼孫僅。培塿對嶽峙。卒能霸斯文。河東柳開氏。嗟吁

河東沒斯文。乃屯否。汨汨三十年。淫哇滿人耳。粵從景祐
後。大儒復唱始。文人如麻立。縱縱攢戰騎。徂徠山磊砢。生
民實頑鄙。容貌不動人。心膽無有比。不度蹄涔微。直欲觸
鯨鯉。有慕韓愈節。有肩柳開志。今讀禹功文。矛戟寒相倚。
寶光千里高。飛出破屋裏。龍音萬丈長。拔出重淵底。雷霆
皆藏身。日星皆失次。我慙年老大。才力漸衰矣。禹功氣奔
壯。今方二十二。前去吾之年。猶有十四歲。今讀禹功文。魂
魄已驚悸。更加十四年。世應絕儔類。卒能霸斯文。吾恐不
在已。禹功幸勉旃。當仁勿讓爾。

西北乙亥中作

吾嘗觀天下。西北險固形。四夷皆臣順。二鄙獨不庭。吾君
仁泰厚。曠歲稽天刑。孽芽遂滋大。虵豕極羶腥。漸聞頗驕

賽牧馬附郊垆。吾恐患已殘。爲之居靡寧。堂上守章句。將軍弄娉媵。不知思此否。使人堪涕零。

乙亥冬。富春先生以老儒醇師居我東齋。濟北張洞明遠。楚宮李溫仲淵。皆服道就義。與介同執弟子之禮。北面受其業。因作百八十二言相勉。

鳳皇飛來衆鳥隨。神龍遊處羣魚嬉。先生道德如韓孟。四方學者爭奔馳。濟北張洞壯且勇。楚丘李溫少而奇。二子磊落頗驚俗。泰山石介更過之。三人堂堂負英氣。胸中拳拳蟠蛟螭。道可服兮身可屈。北面受業尊爲師。先生晨起坐堂上。口諷大易春秋辭。洪音琅琅響齒牙。鼓橫孔子與宓義。先生居前三子後。恂恂如在汾河湄。續作六經豈必讓焉。無房杜廊廟資。吁嗟斯文敝已久。天生吾輩同扶持。

二子勉旃吾不惰。先生大用終有時。當以斯文施天下。豈徒玩書心神疲。

過魏東郊

全魏地千里。雄大視區宇。黃河爲血脉。太行爲筋骸。地靈育聖賢。土厚含文武。堂堂柳先生。生下如猛虎。十三斷賊指。聞者皆震怖。十七著野史。才俊凌遷固。二十補亡書。辭淡續堯禹。六經皆自曉。不看注與疏。述作慕仲淹。文章肩韓愈。下唐二百年。先生固獨步。投篇動范杲。落筆驚王祐。四方交豪傑。羣公走聲譽。一上中高第。數年編士伍。五命爲御史。連出守方土。事業過臯夔。才能堪相輔。鳳皇世不容。衆鳥競嘲訴。獄中饑不死。特地生爪距。貔貅十萬師。盟津直北渡。塞上諸猛將。低頭若首鼠。渴憶海爲漿。饑思鰲

爲脯兩手拏人肝。大牀橫斗肚。一飲酒一石。賊來不怕懼。
帳下立孫吳。罇前坐伊呂。笑談韜鈴間。出入經綸務。
恨未滅。獻策言可處。幽州恨未復。上書言可取。好文有太
宗。好武有太祖。先生文武具。命兮竟不遇。死來三十載。荒
草蓋墳墓。四海無英雄。斯文失宗主。豎子敢顛狂。黠戎敢
慢侮。我思柳先生。涕泪落如雨。試過魏東郊。寒鴉啼老樹。
丈夫肝膽喪。真儒魂魄去。瓦石固無情。爲我亦慘沮。

蜀道自勉

潮陽障煙黑。去京路八千。吏部有大功。得罪斥守藩。朝衝
江霧行。夜枕江濤眠。蛟蜃作怪變。時時攀船舷。魚龍吐火
焰。往往出波間。故爲相恐怖。倏忽千萬端。道在安可劫。處
之自晏然。我乏尺寸効。月食二萬錢。自請西南來。此行非

竄遷蜀山險可升。蜀路高可緣。上無嵐氣蒸。下無波濤翻。
步覺閣道穩。身履劔門安。惟懷吏部節。不知蜀道難。

聞子規

月上半峰峰樹碧。子規啼苦月無色。壯士耳邊都不聞。兒
女眼中淚自滴。古人出處非關身。處兮事親出事君。服勤
至死不敢倦。避勞擇逸豈所聞。我看蜀道誠爲難。嗟爾子
規何云云。王遵九折竟叱馭。班超萬里圖立勳。乘危蹈險
盡臣節。二人至今揚清芬。我本魯國一男子。少小氣志凌
浮雲。精誠許國貫白日。有心致主爲華勳。位卑身賤難自
達。滿腹帝典與皇墳。有時憤懣吐一言。小人謗議已紛紛。
宰相寬容天子慈。八年之中三從軍。從軍官清吾何苦。嘉
州路遠爾勿語。地不爲我易其險。我豈守道不能固。子規

子規漫啼絕。斷無清淚灑向汝。

哀隣家

隣家不遇醫。醫無救病術。朝一醫工入。暮一醫工出。有加而無瘳。皇皇不安室。吁嗟鄰翁愚。予爲病者恤。醫醫一日更千人。盲藥何能療沉疾。

觀碁

人皆稱善奕。伊我獨不能。試坐觀勝敗。白黑何分明。運智奇復詐。用心險且傾。嗟哉一枰上。奚足勞經營。安得百萬騎。鐵甲相磨鳴。西取元昊頭。獻之天子庭。北入域縛主南行。東逾滄海東。射破高麗城。南趨交趾國。蠻子與觀迎。盡使四臣歸來告太平。誰能憑交楸。兩人終日爭。

贈劉中都

吾登泰山上。下視何紛紛。彼角而走者。孰爲磨與磨。彼茁而生者。孰爲蕭與芸。伯樂不復出。駑驥終同羣。卞和不再生。珉玉將誰分。吁哉劉中都。高標凌浮雲。諸侯不薦士。外府不策勳。冉冉趨黃綬。勤勞徒爾云。我媿勢力小。不能叫吾君。勿改芳蘭性。林深須自薰。勿隱沖鶴聲。天高當自聞。

感事

吾嘗觀中夏。地平如砥石。幅員數萬里。車馬知轍迹。帝宅居土中。紫垣當辰極。長江斷其南。絕塞經其北。東海西流沙。天爲限。三代千餘年。天子雖務德。實以險爲恃。四夷皆潛匿。漢唐德稍衰。地勝豈殊昔。暫來還亟去。不敢窺城壁。石晉一失謀。六州淪域。天地破扁鑄。山川無阻阨。貽爾子孫患。固知非遠策。桓桓周世宗。三十纂瑤曆。一歲

破東河。劉崇喪精魄。再歲復秦虜。不庭自柔格。三歲出南
狩。王師極焚溺。江北十四州。取之如卷席。四歲征關南。曾
不發一鏑。三州相繼降。德聲暢蠻貊。李昇請臣妾。錢鏐修
貢職。帝欲因兵鋒。乘勝務深擊。直取幽州城。拓土開疆場。
重收虎北口。復關閉寇賊。是時戰屢捷。六軍氣吞敵。平吳
如破竹。成功在頃刻。惜哉志不就。暴疾生中夕。帝宋承大
寶。聲名發丕赫。全蜀獻土地。舉吳上圖籍。荆潭與甌閩。助
祭來匍匐。開城納江管。御樓受晉馘。區內一正朔。六州獨
割剔。憤憤柳崇儀。才力包且頤。生長在河朔。耳目熟金革。
旗鼓朝治兵。酒殺夜結客。握臂說心誠。倒囊推金帛。客以
豪傑士。遇侯頗感激。往來達厥誠。生死願効力。萬德納我
說。洞然絕嫌隙。事成已有萌。侯去何云亟。豪傑夜空回。帳

中屢嘆息。我覽此二事。天意終難測。撫卷一感傷。兩睫淚
潛滴。

安道登茂材異等科

嘗言春官氏。設官何踞躡。屑屑取於人。辭賦為程約。一字
競新奇。四聲分清濁。矯矯遷雄才。動為對偶縛。恢恢晁董
策。亦遭聲病落。每歲棘籬上。所得多浮薄。嗟哉浮薄流。不
知王霸略。六經掛東壁。三史束高閣。瑣瑣事雕篆。區區衍
述作。隨行登一第。謂身翥寥廓。趨眾得一官。謂身縻好爵。
棲棲咫尺地。燕雀假安託。汲汲五斗米。鴈鴛資飲啄。壯哉
張安道。少懷夫子學。三就禮部試。不肖露頭角。耻用眾入
遇。羞將一賦較。甘心塌翼歸。志懷本卓犖。三賢文章師。大
宋公副樞蔡公詩儒林推先覺。百鳥聲喈喈。獨能辨鸞鷹。參
相范公詩

玉石方混混。海能識至璞。薦之于天子。此材堪輪奐。遂得
望清光。三接上帷幄。僚友視萬乘。器宇誠嶽嶽。願乞數刻
景。古今可揚。縱橫三千言。得儔如奪槩。上下馳皇王。周
旋聘禮樂。遠推災異源。上究星文錯。直言補王闕。危論針
民瘼。天子覽其奏。嘉賞爲嗟愕。旣嘆相見晚。且言同時樂。
一命校秘書。恩澤優且渥。追惜漢武世。仲舒道磽确。再念
文宗朝。劉蕡命蹇剝。有才無其時。徒抱此誠懇。吾君嗣丕
基。百王慙景鑠。萬物蒙休嘉。四夷奉正朔。賢良得其時。才
命不相虐。一謁乃大遇。君臣無隔幘。我賀吾君明。取士得
英卓。我賀吾道行。逢時不蹉跎。行願入廟廊。鈞軸在掌握。
上使斯文淳。下使斯民樸。五帝從可追。三王豈爲邈。

感興

村居何適。種木樹桑梓。田園繞家舍。遠不逾十里。欵段
足乘騎。六步而已矣。但識畜駑駘。安知有騏驎。臘月北風
寒。太行山色紫。君命急如火。城頭見燈燧。雪深馬僵倒。十
夫扶不起。軍法有明訓。後期者誅死。倚鞍思駿骨。撫轡念
綠駟。求之不可得。酸醃滿眼淚。旁聞負薪叟。竊語相譏刺。
居安常念危。在險如處易。臨難始求濟。狼狽徒勞爾。有備
則無患。古人垂淡旨。平居無事時。華厩深祕邃。善穀與豐
草。秣餉十廩。驚駘飽相枕。素食不知愧。伯樂能識馬。每
來如勸說。飛兔與驪。日牽在都市。爲愛千金資。貪恪不
宜置。今日臨艱難。勞力自勉勵。

又送從道

常欲飽暖天下人。其道未得一寸施。子有二親皆七十。糠

覈不充常寒饑。昨日訪我破屋下。具鷄一隻酒一卮。子起却盤筋不舉。吾親未嘗曾食之。對我噓噓涕泗下。孝子之心真可悲。子固與我同一體。相間豈復有毛皮。顧子之親則吾親。吾親凍餒無奈何。飽暖天下心徒爲。送子出門成此詩。

偶作

晉公平淮西。兵出速如神。崇翰伐西川。六十日請臣。太祖初受命。諸侯未盡寔。其蜀廣號敵國。荆潭爲疆隣。王師討有罪。不聞逾十旬。元皇八歲。螻蟻有地長一畛。詎足污斧鉞。尋當投荆榛。是何逾歲月。務行含貸仁。豈茲將帥問。迥無晉公倫。張旗發一號。豈無李處耘。提戈出一戰。豈無王全斌。容茲盈寸蟹。蕩漾於流津。平生讀詩書。曾中貯經綸。薄田

四五畝。甘心耕耨。倚鉏西北望。涕淚空沾巾。

送李唐病歸

春風汝水溫。曉日徂徠寒。之子銜病歸。請予開一言。予知去病術。爲子陳大端。予嘗學聖人。試將道比論。道病非一日。善醫惟孔韓。賞罰絕于周。孔筆誅其姦。春秋十二經。王道復全完。佛老熾于唐。韓刀斷其根。原道千餘言。生民復眠食。道病由有弊。邪僞容其間。身病由有隙。風邪來相干。子欲治斯道。絕弊道乃存。子欲治子身。杜隙身乃安。此理近古鑒。吾言有本源。

蝦蟇

夏雨下數尺。流水滿池泓。蝦蟇爲得時。晝夜鳴不停。幾日飽欲死。腹圓如瓶罌。鉅吻自開闔。頭項或縮盈。時於土坎

間突出兩眼。嗚。是何癡形骸。能吐惡音聲。嗟哉爾肉膾。不
中為犧牲。嗟哉爾聲麤。不中和人情。殊不自量力。更欲睥
睨橫海之鱣鯨。自謂天地間。獨馳善鳴名。萬物聒皆聾。不
知鐘鼓欽欽雷。霆閃閃。應龍戢腦入海底。鳳皇舉翼摩青
冥。此時各默默。以避蝦蟆鳴。何時雨歇水澤涸。青臭泥中
露醜形。失水無能為。兩脚不解行。乾渴以至死。盡把枯殼
填土坑。

寄雷澤張從道

不知有寧死。一室心恬如。臘盡妻未褐。天寒子讀書。澆風
與世薄。古道于時疎。事事皆同我。憶君春草初。

訪田公不過

主人何處去。門外草萋萋。獨犬睡不吠。幽禽閑自啼。老猿

偷果實。稚子弄鋤犁。日暮園林悄。春風吹藥畦。

蘇唐詢秀才晚學於予。告歸以四韻勉之。

憐我山中臥。半年相伴吟。道傳諸子後。易得數爻深。爨或
經年絕。書猶盡日尋。惜哉未終業。親老忽霑襟。

歲晏村居

歲晏有餘糧。杯盤氣味長。天寒酒脚落。春近臙頭香。菜色
青仍短。茶芽嫩復黃。此中得淡趣。真不羨膏粱。

送奉符縣監酒稅孟執中借職

蜀主之後

東西兩處各天涯。去國還鄉喜又嗟。鄒嶧山藏孟子宅。

言孟軻海棠花落蜀王家。深知周道非葵酒。可罪唐臣乞稅

茶。三載此心無一事。聞經絳帳日常斜。事退日就於明復
先生問道

予與元均永叔君謨同年登科。永叔尋入館閣。元均

今制策高第君謨後磨礪元均事業獨予驚下因寄君謨

網羅當日得英雄。文陣三人各立功。海裏赤鯨疑有角。雲中騏驎欲追風。尋聞館閣英聲出。又見賢良大對通。亦說年來畜奇業。蟪蛄何計逐飛鴻。

寄元均

君為儒者豈知兵。何事欣隨壁馬行。裴度樽前坐韓愈。趙成帳下立荀卿。禦戎誰道全無策。對壘寧妨下一枰。須信乾坤養不肖。年三十七困柴荆。

赴任嘉州初登棧道寄題姜潛至之讀易堂

我不從官君下策。其間險易兩何如。連雲棧外四千里。讀易堂中一帙書。慈母含飴垂禿髮。先生懷道接茅廬。莫將

清淚頻頻灑。蜀道之難欲上初。

左綿席上呈知郡王虞部

王與介前任同在睢陽

何事相逢悲喜并。倏然相別二周星。主人鬢髮無多白。幕客襤衫依舊青。目極同思故山斷。涕危共在異鄉零。階前絲竹雖嘈雜。不似南湖湖上聽。睢陽南湖宴游之所也

士廷評相會梓州

道視荀楊雖未至。分如管鮑已知深。一千二百日離別。五十六驛外相尋。重欲同君注周易。且來共我聽胡琴。月留屋角不下去。似與清風憐苦吟。

鄭師易秀才詩奔騰道壯殆有石曼卿學士風骨作

四韻以勉之

曼卿續得少陵絃。絃絕年來又一年。驚起聽君諷新句。灑

如開集味遺篇。一家氣骨疑無偶。萬丈光芒欲拂天。好向
風騷尤著意。他時三箇地詩仙。

留題敏夫隱居

幾迴到此尋逋客。杯案蕭疎滋味長。山飯半甌椽子熟。春
蔬一筍木苗香。四時泉石應無夏。滿谷雲霞別是鄉。終待
共君結鄰里。竹邊相並兩間房。

訪竹溪呈孟節兼有懷熙道

到頭泉石是吾家。坐石聽泉日已斜。一片青衫非富貴。千
竿綠竹好生涯。君曾覽照頭皆雪。我試看書眼亦花。便好
結為山伴侶。教他夔益佐勳華。

招張洞明遠

君言下第我西飛。執手都門淚滿衣。萬里得歸頭半白。經

年相別道應肥。火鑽欲遍龜難死。竹實猶多鳳不飢。暫到
東山慰愁抱。春秋之學說深微。

村居

幽居一畝枕溪棧。堦下杉松纏古藤。常愛園林深似隱。不
嫌門戶冷如僧。麥宜過社猶催種。山近經秋却懶登。已把
壯心閑頓置。少年莫要苦相憎。

燕枝板浣花棧寄合州徐文職方

合州太守髯將絲。聞說歡情尚不衰。板與歌娘拍新調。棧
供狎客寫芳辭。木成文理差差動。花映溪光瑟瑟奇。名得
只從嘉郡樹。燕枝木嘉州出。樣傳仍自薛濤時。有薛濤奇章磊磊馳
聲價。江令翩翩落酒卮。幾首詩成卷魚子。有魚子誰人唱罷
泣燕枝。紅牙管好同林置。紫竹笙宜一處施。願助風流向

樽席杏花况是未離披司空圖有杏花辭文頃在驪陽多

送馮司理之任彭州

李白詩中蜀道難把詩試讀淚沈瀾江形詰曲千迴折嶺

路凌嶒萬屈盤登步去年腰僅折追思今日鼻猶酸予去

嘉州此行君不同屯蹇五馬相知舊長官彭牧與君常同

赴任嘉州待闕左綿七十日通判呂國博日相從吟

酌至嘉陽因成韻寄之

鼎來豈敢道能詩一見何因便解頤鄉國三千里離別杯

盤七十日相知送人江外馬馱岐垂釣寺中魚竭池別後

中秋又重九與誰賞月詠東籬

泥溪驛中作嘉陵江自天散關與予相別二十餘程

山驛蕭條酒倦傾嘉陵相背去無情臨流不忍輕相別吟

聽潺湲坐到明

武仲清江集鈔

十二

孔武仲字常父臨江新喻人至聖四十八代孫也舉進士中甲科調穀城主簿教授齊州爲國子直講歷秘書正字校書集賢校理著作郎國子司業論詆王氏進起居郎侍講邇英起居舍人旋拜中書直學士院擢給事中遷禮部侍郎以寶文閣待制知洪州改宣州坐元祐黨奪職居池州卒年五十七與兄文仲弟平仲並有文名時稱二蘇三孔元祐文人之盛大都材致橫濶而氣魄剛直故能振靡復古如三孔者皆文章之雄也然文仲恃才爲蘇氏所使攻毀程子晚知懊恨歐血而沒君子病之集藁罕傳周益公時搜合爲三孔清江集已不可多得矣一言不知令名剝落爲文人者每得罪聖賢

不必爲奸邪而卒不得與于君子豈獨一文仲哉作者
不可以不慎也因附其遺詩數首於末文仲字經父舉
進士官至諫議大夫中書舍人

馬齧麥

馬齧麥僕飲水北風軒軒搖丘霖十日吁可驚南山喜見
朝日升尋陽北岸霜泥薄窮臘獨爲千里行五里蹠一止
十里復一息楊柳弄輕黃已作春顏色川原入眼雖似快
時節去家還可惜齧麥不須飽飲水勿畏寒起鞭移擔復
五里帝鄉卽在須臾間悠哉役夫勉桓桓征途幾何莫永
歎亦莫悲歌行路難

兒歸行

竹元珍云澤州山中暮春之月有鳥啼曰兒歸者其聲

甚哀問之鄉民云昔有里婦愛其子而憎前室之子欲
逐之未有計乃於種麻時熟其半生其半使二子分種
曰麻生乃得歸而誤以熟者與已子久之所惡之子歸
而已子不返往視之則已化爲飛禽啼曰兒歸今鄉人
以爲種麻之時候余以謂人之憎愛藏乎胸中陰謀所
發乃在分種之際而心手倒錯事與願違朝人暮禽子
母生隔似有巧者主張幹旋于冥冥之間天網雖疎其
應甚密則夫爲人上而接其下用心積慮可不戒哉又
知天之所以垂戒示迹于人者殆將使之推類以自廣
非獨此一女子也乃作詩以記之

兒歸兒不歸朝爲子母歡暮爲禽鳥飛故居不得返溪林
安可依此身寂寞已如此我母在家應憶子子今豈不思

其親空有舊心無舊身。兒歸兒不歸。春已暮。朝多風夕多雨。山雖有泉隴無黍。兒寒有誰訴。兒飢與誰語。萬物卵翼皆相隨。兒今不得見子母。兒歸兒不歸。年年三月種麻時。此聲煩且悲。聞昔一母而兩兒。于已所生獨愛之。麻生指作還家期。唯憎者來愛者去。物理返覆不可知。天公豈欲故如此。善惡報敏如墳墓。至今哀怨畱空山。長爲鑒戒子母間。豈獨行客愁心顏。見歸摧痛傷心肝。

車家行

上坂車聲遲。下坂車聲快。遲如鬼語相喧啾。快如溪沙瀉鳴瀨。一車人十捧擁行。江南江北不計程。青天白日有時住。無人止得車輪聲。晚來驟雨聲濯濯。平曉郊原盡溝壑。方悟車家進退難。不如田家四時樂。

猗猗堂下竹

猗猗堂下竹。我來初萌芽。生意甚寒薄。纔能出泥沙。狂霖一夕作。霹靂連轟車。回首未幾日。其成何速耶。倏然數尺高。秀色蔚以佳。餘陰過盆池。喜躍見魚蛙。乃知地道敏。不待歲月賒。念彼遠遊子。聯翩入京華。勢利勇奔趨。被服爭豪華。外雖逐喜好。顧眎相陵夸。中乃昏智識。有損無增加。曾竹之不如。徒此草木花。經風已簸落。枯稿良可嗟。而我方涉世。浩渺無津涯。因竹亦自悟。慨歌牕日斜。

與廖開甫自淮南同行赴舉相別五年復相遇於蘄水縣爲詩贈之

來書吾初走夷門。傾蓋得君恨不早。蘭溪駐馬復相逢。二紀飛馳如電掃。惜君憔悴力不任。顧我滄浪髮先髡。憶昔

同行氣頗驕。青驄馬快鞍韉好。荒山破屋風豪橫。大澤長
堂雪傾倒。高談灑落見天機。健句縱橫瀆腹藁。辛勤始得
到京邑。文辭不入春官考。可憐六翮委沙泥。坐看羣仙上
蓬島。壯年多難寸心折。勁鏃已衰難破縞。而君施設有餘
才。西佐元戎奪城堡。牛刀拂拭試一懸。如引滄溟灌行潦。
歸來赴愬天子庭。正欲披腹呈瑰寶。片辭未吐疾先入。藜
杖扶行色枯槁。籃輿復指天涯去。長川橫濫聲浩浩。驂驪
不日歸王閑。那久低摧卧霜草。

久長驛書事

空堂淡淡閃燈燭。羣奴鼾眠聲動屋。豆肥草軟馬亦便。嚼
美只如蠶上簇。天事由來不可量。初更月出星煌煌。須臾
變作霏霏雨。客枕不眠知夜長。

題鮑家鋪

郵亭秣馬朝寒天。雪壓山山湧泉。隴頭客飢欲噤口。屋
底人閒猶鼾眠。敲門得薪感相濟。征衫如洗賴火然。江南
亦有安棲處。却羨郵亭人穩住。

舍轎馬而步

嚴風駕雪霜。吾轎頗溫燠。白日煖郊原。吾馬快馳逐。二者
皆得用。翩如雨黃鵠。馬驕倦提策。轎狹厭攣束。何以救斯
弊。奔馳有吾足。副之兩革靴。隨以一筇竹。鳧趨上高岡。虎
步出平陸。折花得低枝。照影臨溪谷。道逢田間叟。時訪以
耕牧。北音稍入耳。俚語俄滿腹。行行及前堆。小汗已霑霑。
芳草可爲茵。吾眠不須褥。人生忌太佚。終歲居華屋。醉飽
耳目昏。軟暖筋骸縮。今吾異于此。千里干微祿。朝隨麀麀

正仲清江集鈔 四
騁夜侶鴻雁宿。戶樞勞乃久。金礦鍛方熟。聊歌以自娛。不作楊朱哭。

送李大夫管勾太平宮居袁州

康定慶曆披羣英。公爲布衣歌太平。熙寧元豐王道興。公作太守逢休明。四十年間走四海。崛然不肯干公卿。峩峩正議天柱壯。皎皎素節冰壺清。胸中慷慨外間易。年高未見白髮生。罷節巴陵歸意銳。奈何公就不敢輕。馳歸天寵乞閒散。諸郎惜祿猶屢爭。毅然不與兒女計。飛章丹扆論赤誠。明朝果得琳宮去。匡廬山色遙相迎。玉溪氣象自瀟灑。新磨古鏡當霄橫。脩篁萬竿飽霜雪。枯碁一局酒滿觥。時邀賓朋叙野史。閒擁雪鶴登巖扃。安排丹鼎夜不寐。邂逅黃金燒可成。未應謝傳入滄海。行見盧敖朝玉京。

代簡答次中見珥

詩誇洞庭湖。蓋舉其粗爾。自此稍南行。更有瀟湘水。瀟湘如此流。淺淡清見底。吾邑在其旁。桑麻百餘里。民經南巡後。淳龐猶可喜。白酒日相鱸魚。夜成市。念方從吏穩。小官不爲恥。先期了賦租。隨時用鞭箠。此外無餘事。看山聊隱几。還作小詩篇。奇聲前御史。御史吾故人。風義今爲偉。超遷未復甚。久仆行復起。但使交期在。不須論遠邇。今夕宿朱僊。相望月明裏。

入關山

輕輿兀兀乘朝暉。漸入山徑行逶迤。昨日喜與山相見。今日得與山相隨。山中老翁迎我笑。借問久矣來何遲。答云王都富且樂。四方車馬皆奔馳。我雖疎慵亦勉強。天恩得

邑方南歸。山林市朝不同調。公雖高簡宜無譏。老翁聞語更驩意。爲我煮水燒松枝。山家十錢得升酒。勸我引觴聊沃飢。爲翁一奏白雪曲。翁亦爲我歌紫芝。此聲淡泊極有味。往往世俗無人知。山中之樂有如此。嗟我捨此將焉之。

新安鋪三首

罩罩澗中草。泠泠山崦泉。泉甘而草芳。旁有屋數椽。夕陽漸近西風起。行客山頭望千里。

薄雲斜日亂山川。投得荒亭晚息肩。地僻誰知藏好景。庭前花數折金錢。

簞如秋水憩廡。素月分輝百倍涼。山木交加無意緒。故欺殊影到人牀。

宿天池

我思廬山遊。發興自年少。偶來得閒侶。更欲窺衆妙。幽林穿濛籠。青峰上嶮峭。遙看天池路。一線在巖微。辛勤得至此。慘寂已西照。雲池桂無根。瞪視心膽掉。暮夜煙雲昏。西巖亦登眺。聖燈稍稍出。弄影何窈窕。一枝分百點。變態不可料。須臾歸寂滅。何處觀朕兆。僧房得棲宿。爽氣冰毛竅。翻然亦興盡。却恨歸途窈。紉懷道隆師。確不奉明詔。似與山間石。慙慙論久要。我今來時迫。繡灰真可笑。明朝指誰谷。裹足登涼輪。時足險未愈指却壁上名。恐爲高人笑。

尋真觀

武皇車駕東南出。訪道求仙希萬一。屏風九疊雲物清。意恐神仙藏此室。羽章之館締構新。壇場夜夜祈星辰。蓬萊縹緲不可到。橋山一閉逾千春。詠真之天在旁側。白晝潭

心飛霹靂田收歲美龍亦開。唯有濟淪照空碧。誰道尋真
是女郎。朝餐松桂夜焚香。明眸綠鬢今何在。意已霞衣待
玉皇。

松上老藤

在二聖寺

古木已昂藏。長藤亦奇怪。潛根蒼蘚中。矯尾青雲外。巖巖
秋霜剝。悠悠夏景曬。摧殘復長養。鍛鍊成老大。蛇蟠筋脉
壯。龍死軀殼在。他時雷破山。大雨灑滂沛。茲松若變化。無
乃遭結。附枝物所患。奪朱古為戒。何不淬斧斤。誅鋤此
蕭艾。

高臺歌

廢地積為冢。昔曾遊宴來。家廢無子孫。東家砌成臺。臺雖
平方冢雖禿。物理廢興有往復。相逢莫喜亦莫愁。乘興且

同臺上遊

賦張芸叟蕃刀

王師前年下靈州。先生奉詔為參謀。軍書堆案不足道。欲
斬名王懸髑髏。官供器械如山積。裝結雖巧體質浮。傳聞
蕃刀最可用。買置不惜千金酬。沙河洗滌血痕盡。瑩若一
水橫清秋。長庚輝輝奪明月。光景迸溢不可收。軍回倉卒
未及試。提挈萬里來荒陬。空齋倒掩閱圖史。淡林永日號
猩鼯。揮鳴且欲驚暴客。敢議與國平冤讐。夜郎蒙恩放李
白。炎嶺得旨還幽求。輕舩共泊長沙岸。幾日對語清湘樓。
紅蓮幕中邀客飲。霧雨咫尺迷汀洲。雜花落盡無處覓。官
妓遣歸不敢留。清歡未免假外物。共說鐵劔勝倡優。君家
所寶世稀有。滿坐傳看驚殊尤。護之太過却銹澀。頑蘚鬱

結纏蒼蚪。橫磨十萬。祗虛語。得此已足。馳燕幽。今公又應
元戎辟。真能寸截鯨鯢不。邠生入幕。宜有畫。定遠出塞。將
封侯。我今喜得隨君公。長江渺渺。平天流。路危或恐逢水
怪。尾脊崔嵬。當吾舟。煩公一效。仗飛勇。爲公椎鼓。傾金鞮。

張秉叔出紫雲回鑿圖以示坐客因爲賦之

開元太平無兵戎。真人味道希夷中。人間之樂已饒足。唯
有青霄未追逐。坐中誰似葉先生。以氣爲糧常辟穀。朝登
員嶠夕崑崙。只與神游不要人。忽逢邀攜看月去。縹緲虛
空生紫雲。蟾宮見不容久住。仙藥飄飄送回去。歸來宮漏
未移更。甲帳明無宛如故。汾水悲歌仙不成。梨園空沒有
遺聲。紅塵如海滌朝市。從此無人遊玉京。

祠二廟之明。以未得順風呈同行

岳州西祠從古有。控帝洞庭湖之口。前對隱顯明滅之湘
山。下接淵淪洶湧之長川。茫茫白沙連絕嶼。淡淡古木蟠
蒼煙。昭靈王左安流右。翠帳朱幡擁前後。鋸牙虎視森兩
廡。氣骨生稜欲奔志。我來纜舟日已昏。袍鞞跪聽祠官言。
伏興進退如法式。四顧詭譎驚心魂。平明結束舟將解。叱
吸仍聞北風大。焚香奏酒殊無計。伏渚藏汀姑有待。二王
威神世所傳。鈴攝鬼怪賓靈仙。好風相送勢不難。舒卷造
化須臾間。波回草動似有意。舉棹開帆卽千里。吟詩賞月
岳陽樓。買魚沽酒巴陵市。

廟下候風呈同行

楚水千百源。洞庭爲壯觀。勢居七澤右。地裂荆吳半。而我
泛扁舟。飄然一歸鴈。來之豈爲益。去亦未足算。胡不吹清

波縱發如飛翰。朝辭廟山曲。午泊巴陵岸。况有三面風。迎
送俱無間。定非偏薄厚。以掇行旅訕。奈何苦流滯。兀兀晨
復昏。采芹朝當蔬。伐竹暮供爨。舟師三十人。餓虎奔芻豢。
使之裹糧絕。慮有探囊患。二王東南望。貌像頗輝煥。歌鼓
歲無休。香燈夜侵旦。我爲江湖士。乞靈從弱冠。四到祠宮
下。霜髯今已粲。王其故舊卹。勿以塗人看。尊師况慈忍。善
道陰有贊。王心或未回。師顏固宜緩。林蛟似見許。歸來整
檣慢。

炭步港觀螢

九華之南蘆葦長。流螢夕起不計雙。爛如神仙珠玉闕。青
羅掩映千明釭。空江沉沉未見月。近浦穿林起還滅。魚遊
鳥宿自不驚。我知此火初無情。

泊趙屯

憶昨省覲趨濡川。蓑衣擁綠方少年。艱難險阻俱未歷。孟
浪勇決唯爭先。舟發趙屯猶未飯。有風北起空濛間。掀搖
三山欺五岳。巨浪倒潑東南天。千林向人俱頓仆。兩岸過
眼真飛鷲。帆檣廻戛河漢底。鷁首俯飲蛟龍淵。跳波濺沫
來四面。坐中時得鯉與鱸。妻啼婢訕殊不顧。兀坐正讀逍
遙篇。爲言方破萬里浪。不爾提月爲神仙。江中逢巨石。頗
突爲引牽。逡巡水勢亦平緩。幸免肝脛輸烏鳶。暮投彭澤
宿荒草。神驚魄顛何能眠。自茲稍悟垂堂戒。鞞紋纔起不
敢前。矜持太過僅無患。往往所至傷畱連。乃知老謀與壯
事。心膽殊異難兼全。重來此地喪洵湧。藏舟別浦看漪漣。
魚跳鷗下自可喜。何用蛟鰐飲流涎。斜陽依依照草木。夾

岸葭茨鋪書壇。兒今弱冠昔何有。昔領無鬚今皓然。二寸
餘年纔瞬息。時事幾蛻如秋蟬。區區走俗亦何賴。安得尺
地巢林泉。

清溪詞

譙門之南溪水長。斜暉倒閃青銅光。下與長江作支股。愁
霖漲天江潦黃。江潦黃入清溪。清溪到底終無泥。還如初
出秀山時。

瓜步阻風

昨日焚香謁聖母。青山鞠躬如負弩。但乞天開萬里明。埽
去浮雲戢風雨。謂宜言發卽響報。豈知神不聽我語。門前
白浪如銀山。江上狂風如怒虎。船癡艣硬不能拔。未免樓
遲傍洲渚。輕盈但愛白鷗飛。顛頓可憐芳草舞。三江五湖

歷已盡。勢合平夷反齟齬。上承歌呼下水愁。北船繫絆南
船去。寄言南船莫雄豪。萬事低昂如桔槔。我當賣劍買牲
牢。再埽靈宇陳肩尻。黃金壺樽沃香醪。神喜借以南風高。
揚帆拍手笑爾曹。不知流落何江臯。荒洲寂寥聽怒號。

賦碼礮笛弟毅父所藏也

羌兒吹笛作龍吟。中有太古之純音。伊人已死笛仍在。千
古月明江水深。誰知巧匠尋山谷。蹙踏溪雲採明玉。雲容
之黯。淺紫輕紅花映雨。正聲隱顯初無端。造化推移
指法閒。黃鐘妍美霜朝暖。無射淒涼暑月寒。輶車走遍天
南北。此笛此聲何處得。韜之湘竹川錦囊。廣坐聊持待賓
客。弘農學士九尺長。頰頰山起髻髻張。從容奏罷陽春曲。
氣衰坦腹眠繩牀。由來雅器自有合。不與教坊管絃雜。君

不見開元名臣宋待中。手揮羯鼓疾如風。

送范中濟侍郎知慶州

平時廣朝中。相見輒歡喜。昂藏八尺身。所負必奇偉。四方欲善敗。軍國盈虛計。叩之如川流。滾滾不知已。天子曰汝能。吾臣鮮其比。而况所設施。粲在邊鄙西。未純一汝可。三軍帥。擒之或縱之。高枕惟爾恃。公拜稽首歸。眉目凜生氣。頑童玩天恩。參養若駒子。欲痛以鞭笞。而畏啼不止。二者不兩全。在所以節制。又如畜狂犬。繫頸不繫尾。收其要害處。進退隨所指。重城徹關。沙漠淨如水。辭別不躊躇。安邊從此始。

江豚詩四言

黑者江豚。白者白鱐。狀異名殊。同宅大水。淵有羣魚。掠以

肥已。是謂小害。顧有可喜。大川夷平。縞素不起。兩兩出沒。矜其頰鬚。若俛若仰。若躍若跪。舟人相語。驚瀾將作。亟入灣浦。踣檣布筏。俄頃風至。歛山搖岳。浪如車輪。氛霧相薄。舟人燕安。如在城郭。先事而告。昭哉爾功。鰐啗牛馬。頭鼉象龍。暴殄天物。安得爾同。于人無害。所欲易充。暴露形體。告人以忠。又多膏油。以助汝工。江湖下貧。機杼以農。鳥鵲知風。商羊識雨。大厦之下。風雨何苦。豈知舟航。方在積險。以爾占天。著蔡之驗。古之報祭。不遺微蟲。孰揚爾烈。登薦蜡宮。世不爾好。復惟爾惡。我作此歌。爲昭其故。

堤下

堤下人家喧笑語。高揭青帘椎瓦鼓。黃流滾滾經簷甍。一任征夫作船苦。綠榆覆水平如杯。前灣旋放水頭來。淡如

怒虎著船底。玉石磊砢相喧逐。黃河雖斷隨渠急。舟楫舒
遲行旋澀。獨上平堤望遠天。衣裘已畏西風入。

汴河

磬渠斜與昆河接。河遠渠慳幾可涉。狂霖一漲高十尋。迅
瀉東來比三峽。崩騰下與淮泗會。清泚亦容伊雒雜。橫空
九闕真垂虹。怒捲千艘如敗葉。祇堪平地看洶湧。何事乘
危理舟楫。共夫鵝鸛行天上。遙與谷中相應答。但憂心手
一乖迂。巨舶高檣兩摧折。而余進退久安命。揭厲以望初
不懼。妻孥亦已慣江湖。笑語猶如泛山陬。鳴弓擊柝驚夜
盜。掘如榜鰕佐晨饑。時登絕逕步榆柳。或面荒陂看鳧鴨。
我生東南趣向野。揮弄清溪看茗雪。枕流漱石真所便。履
濁凌險終未愜。觚稜漸喜金闕近。釜甑何憂米鹽乏。渾如

海客泛枯槎。繚繞明河望閭闔。

閣下觀峴山圖

峴山巉巖清溪濱。倒影萬丈之瀟淪。往歲嘗有去息吏。熱
地尤多高蹈人。少年仕宦頗落魄。時登絕嶺攀蒼冥。幽花
美草頗娛目。斷碑列碣還傷神。曉猿夜鶴輕相別。從此奔
走十八春。舊遊不復齒頰挂。方知到骨俱埃塵。麟臺昨日
見圖畫。醒若楚客還羈魂。方嫌一幅論萬里。秋江綠水何
粼粼。人心與物本無別。正爲利欲相埋湮。神功妙手如喚
覺。滿座風月來相親。騎驢徑去自可到。猶愈縹緲邀西遊。秦
剩沽宜城醉其下。夕陽倒載望冠巾。

食水

冬水冽冽雖可畏。夏水皎皎人共喜。休論中使押金盤。荷

葉裏來深宮裏。曾煩肺酒聊一蘇。任爾青蠅相趁死。經時不壞已可憐。濟物之功尚如此。人言霜雪比小人。我謂堅冰似君子。

愧魚亭

昔聞魚可美。今見魚可愧。邂逅臨池處。瀟灑出塵意。秋風八月起。江湖水染紺。碧霞綺疎。悠然掉尾波間去。須信人生不及魚。

子瞻畫枯木

寒雲行空亂春華。西風凜凜空吹沙。夫子抱膝若喪魄。誰知巧息中萌芽。敗毫淡墨任揮染。蒼莽菌蠢移龍蛇。略增點綴已成就。止見枯木成槎枒。更無丹青相掩翳。惟有口鼻隨穿呀。往年江湖飽觀。或在山隈溪水涯。腹中空洞

夜藏魅。巔頂突兀春無花。徑淡最宜繫畫舸。日落時復停歸鴉。蘇公早與俗子偶。避世欲種東陵瓜。窺觀盡得物外趣。移向紙上無毫差。醉中遺落不祕惜。往往流傳藏人家。趙昌丹青最細膩。直與春色爭豪華。公今好尚何太癖。曾載木車出岷巴。輕肥欲與世爲戒。未許木葉勝枯槎。萬物流形若泣露。百歲俄驚眼如車。樹猶如此不長久。人以何者堪矜誇。悠悠坐見死生境。但隨天機無損加。却笑金城對宮柳。泫然流涕空咨嗟。

高樓行

天悠悠雲羃羃。半夜微聞奏笙笛。爛彩蹙飛仙。鷓雛戢其翼。高樓百尋。大途東臨紫垣望青都。中山黃封。壺五陵豪來少飲娛。夷門帝家盛遊樂。奔走環觀溢城郭。如

今吏橫索錢。縱飲誰愁家寂寞。

平陽歎

壞雲如山壓齊魯。六軍顏色如灰死。高郎元自解琵琶。萬歲無愁作天子。伯升何曾上青天。濺血遺痕芳草間。長城萬里自推仆。駿馬只馱馮小憐。姦臣百計爲蠹賊。不但妖娥解傾國。熊羆哮鬪蹙平陽。馮妃對鏡嬌權妝。死生契濶不相棄。雙雙刎頸長安市。

歸舍吟

長堤夾天滿。浩蕩東南流。上有騎馬客。枯髯清兩眸。馬後無飛蓋。馬前無鳴騶。進無趨趨謁。退無輕俠遊。攜金入市賣。十鋪不一售。包裹却歸舍。置之牀一頭。半夜光滿屋。潛知是精鏤。貴物莫賤貨。不如淡巷收。一旦遇知者。堆斗價

可求。寄謝路傍子。神珠難闇投。

龜石

平川洶洶經南國。疋練橫拖半天碧。洪濶巨浪之中央。忽見顏嵬太古石。此石由來幾許時。混元一氣初開闢。神功割破混沌胎。劃落半空隨霹靂。非鼇非鼈不可辨。有若神龜見蹤跡。精剛不待媯皇鍊。渾朴寧從巨靈擘。我知神物本天性。推移運轉非人力。當時大禹走天下。驅至九江爲納錫。萬牛攢車載不動。鐵軸崢嶸自堆積。秦皇鞭山移四海。怒視不能移咫尺。至今獨立猶驚人。地志山經不能測。千靈萬收誰復知。一片堅頑粗可。昂頭突出翠濤中。跪足橫躡九泉脉。勁殼縱橫竇穴穿。當心一搭莓苔黑。淵潛不見曳尾狀。日爍猶驚負圖色。青髯剝落向何處。秋草綏

綏神露滴勁健曾支玉女牀。爛斑似點垂龍額。漁翁未網
先自駭。靈著欲伏安可得。鼉鼉縮首不敢近。蝦蟇巡行夜
戰惕。歲冬大寒百聖伏。圖勁勢無欹側。風磨霜鍊無日
休。髮髻皴痕成兆拆。負才不免剝腸累。至珍惟藉天公惜。
灼以炎皇之火精。爨以少昊之金液。神鑽鬼卜不見形。陰
陽造化無遺策。大哉龜者物之精。歲久已化為真形。有時
月黑無人夜。繞岸光芒芒自生。下駭溪潭怪屋窟。上應中
天玄武星。萬象森森下相向。來決吉凶真偽情。姦狐妖鼠
已破膽。山魃野魅見亦驚。波神吞氣不敢喘。四面長漪鋪
席平。吾聞溪老記往歲。半夜風雨來冥冥。剗然曳轉大潭
左。百里震驚如雷霆。憎摧折雖萬狀。崔嵬孤高終自靈。
吁哉天地至奇物。何為流落於江城。銅馬猶聞禱漢殿。神

羊昔亦馴堯庭。便當推置玉堂上。古貌岌岌無欹傾。姦臣
猾豎作狐媚。見之頰面先吞聲。凶荒水旱必可卜。倉卒變
怪皆先明。喪魄萬里外。情縮不敢窺天兵。龜乎龜乎
用不用。壯士與爾同死生。

發王務

曉隨燈火背千家。落盡疎星見遠霞。一餉春聲回宿鳥。半
天寒色在啼鴉。臨陂弱柳猶藏葉。當路殘梅已盡花。賴值
時光正妍潤。穩看風物到涼華。

發蔡州

悠悠清曉歷長陂。楊柳溝塍鴈鷺池。風色著人寒料峭。日
光生野暖融怡。鶴歸雲海心空在。鴈度湖天力已疲。客路
馳驅元不定。西遊應有再來時。

書事二首

路逢行客向江州。勒馬荒郊爲少留。家事滿懷無紙寫。好將言語付蒼頭。北來煙爨苦淒涼。金竈崢嶸突尾長。滿篋香秬無處用。郵亭一飽待桃榔。

和竹元珍夜雨

帝城塵土熱如湯。喜有殘宵雨送涼。旅枕夢雲縈宋玉。空階詩息感何郎。香迷舊理煙初斷。燈倚輕寒焰不長。明日御溝應更好。一番晴色弄垂楊。

旅枕

旅枕春風底。倏然一夢驚。漏移清禁遠。天入小窻明。桂玉梁園費。山椒楚客情。蕭條過百五。猶有賣花聲。

呈竹元珍

一室蕭然傍禁城。塵埃不到旅懷清。水流紅片知花落。雨浥蒼苔見筍生。感物已憐春寂寞。辭家億是歲崢嶸。知君亦有淹留歎。歸夢西隨杜宇聲。

經父云自到京止得一書頗懷憂想因寄

萬事崢嶸不自由。年來書信最綢繆。鴈飛玉塞無多地。人望神都正倚樓。祇恐邊風多浩蕩。故令音驛每遲留。何如款段相隨出。鄉曲長爲馬少遊。

贈程壞

識盡公卿更食貧。蒼髯瘦骨走京塵。高談亦與時多忤。屢中方知術有神。前會渺茫渾不記。遠遊蕭索復相親。疑公別得壺中趣。回首人間二十春。

題報慈寺花藥園

少時隨衆蹂京塵。曾倚朱欄看晚春。二十年間頭半白。方知花木解磨人。

羅港

八節難頭駐馬蹄。淙淙流水日沉西。歲時久已成陳迹。風景全然似此溪。蘭棹倚洲人競過。籃輿索筆我閒題。桃源仙境今何在。懊惱嬌鸞向暮啼。

過馬鞍山

足歷黃州百疊山。更無平地只岡巒。物皆枯槁非人世。石最崔嵬是馬鞍。畏日流金紅豔豔。亂沙堆雪白漫漫。崎嶇出盡聊憇息。喜有松聲六月寒。

君自西林還城中以詩爲別

天上優遊侍從臣。還鄉書錦坐生春。不矜富貴知餘事。同訪溪山有故人。方外笑談無畛域。兩餘泉石長精神。西林路口嗟輕別。善護青雲萬里身。

入山三首

冠蓋成陰中路迴。獨攜蓮社道人來。千巖萬壑初相識。分付晴嵐面面開。路出西林興倍長。輕衫短蓋入秋陽。層崖蔽日多清影。溪谷迷人有異香。訪古不辭穿絕磴。參禪直爲遍諸方。此身似是遼東鶴。偶逐飛雲到故鄉。十歲不出還可嘆。經旬遍走梵王家。羣山拍手向人笑。方朔今來何晚耶。

黃州

客路深秋一轉。送淮天牢落。此將窮。城開雲水蒼茫處。人在茅簷掩映中。對岸武昌風月近。千年赤壁是非空。愁愁陳迹慵開口。謾把釣竿伴釣翁。

吳章嶺作

廬山北轉是吳章。巖草紛紛靜有香。洞口流泉似相送。人間天上莫相忘。

晚登庾樓

却從江漢望江廬。湓口風波日愈疎。滿甕尚畱桑落酒。登盤今有武昌魚。斜陽柳色明碕岸。纖月波光濕太虛。鸚鵡洲前弔豪士。重將詞賦爲君書。

蘇子瞻雪堂

古縣東邊仄徑開。先生曾此斲蒿萊。鸞凰一去應不返。花

柳當年皆自栽。畫壁蒼茫畱水墨。朱欄剝落長莓苔。鄰翁笑我來何暮。檢點風煙興盡回。

鄂州

綠柳陰陰蔽武昌。汀洲如畫引帆檣。一江見底自秋色。千里無風正夕陽。暫別勝遊渾老大。追思前事只淒涼。賢豪况有遺蹤在。欲買溪山作漫郎。

蕭灑堂

旅平凹。剪荆榛。畫棟明窻學隱身。政簡琴書聊度日。地閒花木爲畱春。一盃濁酒迷今古。五字清吟泣鬼神。暫伴登臨對佳景。衣襟渾覺減埃塵。

湖山亭

縣山峻絕有新亭。公退時來看洞庭。天外微茫二湖合。波

心縹渺一峰青。非時爽氣生雲雨。永夜寒光浸斗星。千古
登臨增健筆。投文猶可弔湘靈。

五鼓乘風過洞庭。湖日高已至廟下。

半掩船篷天淡明。飛帆已背岳陽城。飄然一葉乘空度。卧
聽銀潢瀉月聲。

南津灑澗夜風微。投曉湖靈更發機。想像虛空聞帝樂。凌
巡波浪匝天圍。三湘路指平蕪轉。兩舸帆爭白鳥飛。却上
叢祠薦牲酒。荆雲隱隱尚朝暉。

城上亭上

更無人跡逐攀躋。廬岳烏藤手自攜。滄海誰論六月息。茂
林今得一枝棲。幽芳滿徑春難老。翠樾連雲日易西。况有
北郊宜曠望。八餘聊此發醯雞。

輶車館

野濶天長入望青。眼中虛豁到鴻冥。偶同楚俗來同樂。下
視湘江笑獨醒。風緊水光時蹙練。日斜山影半迴屏。扁舟
過此方年少。老矣重來鬢漸星。

湘潭

祿仕飄然寄楚鄉。才能苦短志方強。已栽綠柳如彭澤。况
有黃金似樂陽。風颭湘波天影動。雲來衡岳雨聲長。尚疑
早濕難安處。更起西邊百尺堂。湘潭近有告發金坑者。余
作堂於廳西。謂之明堂。

九月二十二日西館雨中作

西館蕭然擁芻裘。渾無桃李似潘侯。路多綠竹遮欄雨。池
有殘荷掩映秋。蠻獠謳歌逢樂歲。江湖風景憶扁舟。衣冠
到底爲身累。祗慕逍遙寄一丘。

寄范清老

日挂西南有薄輝。稜稜霜氣犯寒衣。不愁斗柄隨春轉。祇怕梅花學雪飛。湘浦波光頻送別。湓城山色屢思歸。高人只在南坡住。好共畱錢買釣磯。

湘上

南歸曾泛碧湘船。擊伏臨流似浩然。平野幾枯殘歲草。綠波猶浸舊時天。簿書倥偬嗟巖邑。樽酒歡娛憶少年。尺水片雲今我有。亦當風月爲畱連。

寄劉貢甫

秀水先生今傑才。崎嶇山徑滯蓬萊。飛牋岳麓吟秋草。把酒襄陽醉臘梅。東郡政聲無豈弟。南樓風月且徘徊。朝廷選用多英俊。早晚劉郎卽到來。

自寶豐倉歸

岳雲成凍把春寒。十里崎嶇倦往還。馬上朔風回繫帶。雪中微酒見開顏。含黃欲坼江邊柳。蘸綠相垂水上山。拋掉一官如糞壤。好隨魚舸此中間。

與陳董二君相會于真州經月甚樂詩寄董陳君兼感存沒

平生交友半成塵。想見當年樂會文。別淚茫茫添海水。愁懷黯黯塞江雲。青衫脫去誰同老。白首追隨尚有君。官暇更將碁子學。他時籌局當功勳。

讀王逢原文奇其才擇甚精錄一編

人喜相知自昔然。况君埋玉未多年。雄文一讀千行淚。青眼相期萬古傳。已掇條枚收美實。更披沙石貯清泉。東齋

倒掩無人語。火煖燈明手自編。

次韻和鄧慎思謝劉明復畫道林秋景

鈴齋清話未更端。一掃禪林景趣完。縹渺已裝新殿塔。縈
紆仍引外峰巒。冷風有意生空澗。密雪無聲下廣寒。平昔
所遊今在眼。淒涼疑是夢中看。

和李時發春日見寄

聞道重湖路未通。悠然身在碧湘中。崎嶇水國猶千里。牢
落春花已半空。江浪濺寒侵小睡。岳雲篩雨響疎篷。君詩
亦說清幽趣。便覺年來氣味同。

登湘陰北寺江亭

古縣峩新剝。孤亭占上頭。野苔侵坐綠。江水帶天流。絲斷
湘靈瑟。蘋荒帝子洲。人寰真似夢。頃刻已千秋。

辭三妃廟

盤空鳥鵲噪叢祠。船上行人半起時。殘月濛濛傾島嶼。南
風嫋嫋透旌旗。開帆便欲日千里。別廟仍澆酒一卮。岸芷
洲蘭俱可薦。新聲翻入九歌詞。

過洞庭

朝來四境宿雲披。漸放扁舟入渺瀰。漠漠衣襟凌水霧。悠
悠簾幕挂天絲。波平自喜看書穩。風軟翻愁出險遲。今夜
君山興不淺。登臨應及月明時。

登涵暉亭

常時洲島隔波瀾。故覓君山直上看。菴畫園林春減色。水
晶宮闕畫添寒。州城斜引羣峰小。湖面平吞數驛寬。坐久
西風響喬木。扁舟思到武陵灘。

登齊山

路出南堤息灑然。烏藤點點破苔圓。山腰仄塞元無路。洞底虛無別有天。六月清風醒客醉。千叢怪石伴僧禪。近人登覽方為貴。從此匡廬不直錢。

銅陵縣端午日奉兄弟

桺浦移舟帶雨行。奔波南北是平生。忽驚佳節臨端午。還記當年客禁城。丹杏飢盤淡簇火。碧醪傾盞齏堆錫。菖蒲角粽俱如舊。何事樽前醉不成。寄經甫

南北飄然各轉蓬。佳辰無路笑言同。銅壺縣冷更微雨。白鵲樓高來遠風。粽剝雪膚明席上。酒傾玉骨映盃中。區區羈旅無歡笑。遙想華堂屢一烘。寄季毅

清涼寺

白寺荒灣略艤舟。攜筇來作上方遊。何年巧匠開山骨。自古精兵聚石頭。故壘無人空向久。高堂問話稟生秋。雲庵快望窮千里。一借澄江洗客憂。

繫舟長蘆作

夜泊長蘆星滿川。晚來吳楚氣昏然。雲雷相會還成雨。江海交流獨艤船。廢室與人喧白浪。荒村何處起青煙。文書滿眼從拋棄。却倚蒲團學坐禪。

宮詞二首

十頃西池碧近天。春筵調馬教龍船。至尊勤政歡嬉少。企望鑾輿又七年。
雲霧猊香錦繡帷。千官重列序賓儀。欲知湛露零蕭處。盡在天杯側勸時。

草石寺

寺有潘闕題壁權德輿晏坐記

高士去已久。餘踪猶可知。竹陰侵晏坐。山影在平池。塵蝕參軍墨。苔侵相國碑。漫尋瀟灑趣。俯仰愜心期。

惜竹

并引

東齋有竹數竿。翠蔚可喜。其旁衆筍附生。漫益茂。最後出者尤若奇特。無不應意解籜。未盡而為老兵手折之。悲夫。以干雲蔽日之勢。而摧于牕戶之下。以凌霜冒雪之姿。而失於俄頃之間。環步往來。悽愴良久。不能忘情。既而自譬解以為陰陽之化育。天地所覆載。孰非假安。自四肢百骸外。至耳目所接諸物。若器皿若室屋。親愛之聚興。馬之隨執。能固守而終全之。其會合出於暫然。至於離散壞熄。此理終在何獨。一竹可傷而介然于

懷乎。乃頗能自遣。而宥役兵之罪。然復一到其下。則初心還起。不能平也。余真大惑者歟。抑物之難得而可愛。當然者也。姑置其說。寓之以詩。

老蘚墻陰夕照間。何人折我翠琅玕。卽之綠葉隨塵化。猶有低枝帶露殘。不放雲稍侵霰雪。因嗟世故足波瀾。故園未乏簞簞品。十頃繁陰六月寒。

贈夢符朝議

玉溪在夢符宅後

入笑公衣不浣濯。我憚公心霜雪明。青山仕宦有真恣。白首鄉閭無惡聲。相逢回首又再歲。暫去還來觀太平。何事南歸太果決。蕭然遠作玉溪生。

送望聖監南嶽廟

還鄉同赴紫宸朝。笑語從容慰寂寥。白髮侵凌今滿鑑。青

春羈旅舊連鑣。易江小隱西園在。湘浦新除道路遙。老境不堪論契濶。東風官柳亂堤橋。

遊凝祥池同晁無咎作

平時念江國。此地愜幽情。楊柳繁無路。鳧鷖遠有聲。郊原斜日下。襟袂好風生。把酒須臾。還家下隔城。

遊洪福寺

清晨戒童僕。馬匹出皇州。欲探逍遙趣。因成爛熳遊。藤蘿回晝暝。雲雨送春愁。傍近緋桃塢。尋春亦少留。

遊州南同文潛作

峩峩宮殿列仙居。淡水方圓氣象殊。萬里舟船會京洛。幾人詩酒到蓬壺。日斜清弄來幽谷。風定鶯紅滿綠蕪。語罷恍然真夢幻。不應天色有江湖。

館中桃花

蓬壺淡絕鑠芳菲。初見仙桃第一枝。天近自應風景別。春長莫恨化工遲。相重朱戶人稀到。半掩香苞蝶未知。想像江南今盛發。亦經頻雨稍離披。

次韻瀛倅鄧慎思見寄

官是麟臺却佐州。蓬瀛俱稱列仙遊。憶分曉色趨天闕。想對春風倚郡樓。書付塞鴻應易到。人如隴水正分流。江湖未有歸耕處。何日相逢說旅愁。

試院書事呈子駿明叙

憶初懷詔下天街。紅燭相隨御史來。場屋喜遵新定格。朝廷息見已成材。誅鋤險異歸平坦。洗濯英華出草萊。文藻諸生皆足用。更期儒行比騫回。

館中夏日

珍簾舒明玉。涼牕納碧天。殿樓傳遠鼓。宮井取深泉。竹籜風頻脫。榴房晚更鮮。却驚非故國。五月未聞蟬。

直舍新闢西牕二首

推倒西墻平日功。暑天饒作一牕風。人間豈有炎涼隔。只在施爲向背中。

幾歲榴花蔽曲隈。繁陰初逼坐中來。西鄰小檻如圖畫。偷入簾帷次第開。

送芸老通判

御史連章乞此行。制書優遣副專城。京都豈乏翱翔處。忠義先期去就明。祖帳盈盤留晚色。關山草木動秋聲。西州莫作經年計。早晚君王召賈生。

蛤蜊

去年曾賦蛤蜊篇。旅館霜高月正圓。舊舍朋從今好在新。時節物故依然。棲身未厭泥沙穩。爽口還充鼎俎鮮。適意四方無不可。若思鱸膾未應賢。

次韻李端叔見贈

君才瀟灑應時流。久滯寧非命壓頭。昨見河南推賈誼。行聞天子召吾丘。已無痛飲觀風味。猶有新詩講報投。京洛塵沙著人甚。清涼高爽憶宣州。

寄會稽丞趙振道

龜峰琬琰翠成堆。軒檻前當秀色開。此地登臨比圖畫。與君談笑繼樽壘。傳聞佳景無時乏。依舊清江不斷來。今日關河隔千里。相逢何處少徘徊。

聞表息正卒于宿州

畫舸西河載酒回。東籬持菊待君來。何知頃刻成千古。不及從容共一杯。羈旅夢魂難際接。平生交分但悲哀。中年萬事長心惡。何處愁眉得暫開。

苦寒

晨風獵獵卷書堂。坐愛松筠耐雪霜。歲律崢嶸催暮景。時光宛轉逼新陽。金卮滿引顏雖解。石火淡籠焰不長。安得仙家却寒術。吸喬霞氣赤城傍。

介之會徐氏家飲薄暮不歸爲詩招之

金鞍駿馬照朱門。樂會高張晉楚軍。狂客浩歌翻白雪。艷姬醉舞轉紅裙。花光灼爍筵前錦。酒韻氤氳盞上雲。爭似竹牕風月夜。青燈殘茗細論文。

題介之小閣

畫簾初卷碧山低。面面青藍翠拂衣。秋水暮天長一色。清鷗沙雁或雙飛。煙霞逗眼光相亂。松竹敲風韻更微。却笑屈原顛顛甚。漁歌何苦淚交揮。

江上

萬里長江一葉舟。客心蕭索已驚秋。亂霞影照山根寺。落日光翻水面樓。淺浦耀金知躍鯉。前灘點雪見棲鷗。少年壯氣悲寥廓。未忍滄江下釣鉤。

夜歸口占示同行者

一天星月明如晝。萬樹杉篁吟夏秋。隱約棹歌聞別浦。青燐漁火見孤舟。身居簡冊三冬學。心入滄溟萬里遊。鬢髮重陽正明日。與君攜酒豫登樓。

文仲清江集鈔

秋月

孤枕夜何永。破意秋已寒。雨聲衝夢斷。霜氣襲衣單。利劍摧鋒鏑。蒼鷗縮羽翰。平生衝斗氣。變作淚沍瀾。

次錢穆父新涼可喜

霜廳結新寒。草木起餘怨。翩翩前庭葉。追逐已千萬。斜陽背西壁。迤邐落藤蔓。安得金滿堂。聊換酒家券。追隨雙鴻鵠。擺脫舊籠圈。胡為汗流楮。日與蠅爭針。常恐計不就。更以詩屢勸。江湖秋水高。百尺風帆健。何當開竹溪。玉腕互酌獻。左手持蟹螯。平昔固有願。

四月三十日慈孝寺山亭席上口占。送子敦都運待制赴河北。

送客城南寺。蕭然雲泉秋。客意在萬里。聊作須臾游。昨夜過新雨。清風滿梁州。簪裳合俊彥。河圖並天球。古來功名人。未就不肯休。譬如鑿空使。尚致安石榴。矧今南畝氓。往往東西流。君能安輯之。千倉與萬輶。

將至南都途中感舊二首寄錢穆父

北風吹雪滿皇州。攜手同為落魄遊。雲一作漢路岐騰萬里。江湖塵土積千憂。世情共逐飛蓬轉。人事都如激浪流。只待清談慰愁病。月明幾夜促歸舟。
苒苒星霜七換年。故人已上碧雲天。書憑去鴈雖無便。路出名都亦有緣。秋晚樓臺風作雪。雨餘碕岸柳生煙。應煩北道開樽俎。又費公庖幾萬錢。

次韻穆父見戲

當年同望緒袍光。萬事爭先落彩銜。一別已經陵谷變。再
 來不覺路岐長。黃金久壓腰間重。白筆纔容柱下藏。惟願
 山林息枹鼓。免教鴟隼嚇鴛鴦。
余家近被穿窬累夕隣居
 擒盜者叫呼達旦未嘗獲
 安寢也持此以乞隣于京尹

此語雖上...

...

雜至南橋渡中感舊二首寄謝...

拾東西瀛舊詩於御之千食與無聊
 人未覺不宵木杵破羅空動尚疑安以聯際今南越君
 酸味雨帶風漸燥微曾幾合外每成圖並天粧古木也
 滋海烟雨寺蕭蕭雲泉林客意五湖甲師介原史况...

